

四庫全書

史部

欽定四庫全書

後漢紀卷二十九

晉 袁宏 撰

孝獻皇帝紀第二十九

建安元年春二月執金吾伏完為輔國將軍開府如三公是時董承張陽欲天子還洛陽楊奉李樂不欲尚書上官洪言還洛之議李樂斬洪由是諸將錯亂更相疑貳董承奔野王韓暹屯聞喜胡才楊奉之塢鄉欲攻韓

暹上使人喻止之夏五月丙寅遣使至楊奉李樂韓暹營求送至洛陽奉等從詔六月乙未車駕幸聞喜楊奉胡才悔令乘輿去乃與李樂議欲還大駕詐言當遊澠池東以避匈奴上不從庚子車駕從北道出傍山而東無匈奴寇李樂媿其言懼而辭還是時糧食乏盡張陽自野王迎乘輿賑給百官丙辰行至洛陽幸故常侍趙忠宅張陽治繕宮殿丁丑大赦天下是月孫策入會稽太守王朗與策戰敗績八月辛丑天子入南宮陽安名

陽以為已功故因以名陽謂諸將曰天子當與天下共之幸有公卿大臣陽當扞外難何事京都遂還野王楊奉亦屯梁癸殂張陽為大司馬楊奉為車騎將軍韓暹為大將軍領司隸校尉皆假節鉞是時州郡各擁兵自為莫有至者百官窮困朝不及夕尚書已下自出采樵或餓死牆壁間為吏兵所殺暹等各矜其功任意恣睢干亂政事於是曹操議欲迎乘輿或曰山東未定韓暹楊奉親與天子還京北連張陽未可卒制司馬荀彧勸

之曰昔高祖東征為義帝縞素而天下歸心自天子播
越將軍首唱義兵徒以山東擾亂未能遠赴關右然猶
分遣將帥蒙險通使雖禦難於外乃心無不在王室是
將軍匡天下之素志也今車駕旋軫義士有存本之思
百姓懷感舊之哀誠因此時奉主上以從民望大義也
下雖有逆節必不能為累明矣韓暹楊奉其敢為害若
不時定四方生心後雖慮之無能及也操從之辛卯操
詣關貢獻廩公卿以下操陳韓暹張陽之罪暹怖單騎

奔走以上還陽有翼駕還洛之功一切勿罪於是誅羽
林郎侯所尚書馮碩侍中壺崇討有罪也封衛將軍董
承輔國將軍伏完侍中种輯尚書僕射鍾繇尚書郭浦
御史中丞董芬彭城相劉艾左馮翊韓斌東郡太守楊
衆議郎羅邵伏德趙蕤為列侯實有功也追贈射聲校尉沮
儁為弘農太守矜死節也符節令董昭說曹操曰將軍
興義兵以誅暴亂朝天子輔翼王室此五伯之功也已
下諸將人人殊異未必服從今留匡弼事勢不便唯有

移車駕幸許耳然朝廷播越新還舊都遠近企望冀一獲安今復徙車駕不厭衆心夫行非常之事乃有非常之功願將軍策其多者操曰此孤之本志也遂言幸許之計上從之庚申車駕東楊奉自梁欲要車駕不及已已車駕到許幸東營甲戌鎮東將軍曹操為大將軍更封武平侯操固讓不許太尉楊彪司空張喜以疾遜位冬十月戊辰右將軍袁紹為太尉紹恥班在操下不肯受操乃辭大將軍丙戌以操為司空領車騎將軍辛卯

曹操征楊奉於梁奉奔袁術呂布襲徐州劉備奔曹操
初陳郡人袁渙為劉備茂才避地江淮之間為呂布所
拘布令渙作書罵辱備渙曰不可再三強之不許布大
怒以兵脅之曰為之則生不為則死渙顏色不變笑而
應曰渙聞唯德可以辱人不聞以罵使彼固君子也且
不恥將軍之言彼誠小人也將復將軍之意則辱在此
不在於彼且渙他日之事劉備猶今日之事將軍也如
一旦去此復罵辱將軍可乎布慙而止渙字曜卿司徒

滂之子也。渙少與弟微俱以德行稱。是時漢室衰微，天下將亂，渙與微閒居，從容謀安身避亂之地。渙慨然歎曰：「漢室陵遲，亂無日矣。苟天下不靖，逃將安之？若天將喪道民，以義存唯強而有禮，可以庇身乎？」微曰：「古人有言，知幾其神乎？見幾而作，君子所以元吉也。天理盛衰，漢其已矣。夫有大功，必有大事。此又君子之所深識，退藏於密者也。且兵革之興，外患衆矣。微將遠蹈山海，以求免乎天下。穀亂各行其所志，微避地至交州，渙展轉。」

劉備袁術呂布之間晚乃遇曹公渙說操曰夫兵者凶器也不得已而用之鼓之以道德征之以仁義兼撫其民而除其害夫然故可與之死可與之生自大亂以來十數年矣民之欲安甚於倒縣然而暴亂未息者何也豈政失其道歟伏聞明君善於救世亂則濟之以義偽則鎮之以樸世異事變治國不同不可不察也夫制度損益此古今之不必同者也若夫惠愛天下而反之於正雖以武平禍亂而濟之以德誠百王不易之道也公

明哲超世古之所以得其民者公既勤之矣今所以失其民者公既戒之矣海內賴公得免於危亡之禍然而民未知義唯公所訓之則天下幸甚操重演言以為軍諮祭酒渙常謂人曰夫居兵亂之間非吾所長每讓不敢處也張濟自關中走南陽為飛矢所中死從子繡領其衆屯宛天子既免張陽賈詡去李傕託於段熲頃之復歸張繡

二年春正月曹操征張繡繡降其季父濟妻國色也操

以為妾繡由是謀叛襲操七軍大破之殺其二子自曹
操之迎乘輿也袁紹內懷不服紹既兼河朔天子畏其
強操方東憂呂布南距張繡及繡敗操軍紹益自驕而
與操書悖慢操大怒動止變於常衆皆以為失利於繡
故也僕射鍾繇以問尚書令荀彧彧曰公以明哲必不
追咎往事也殆有他慮乎遂見操以問焉操以紹書示
之且曰今將征不義而力不敵如何彧對曰古之成敗
誠有其材雖弱必強苟非其人其強易弱劉項之事足

以觀矣今與公爭天下者唯袁紹紹貌外寬內忌任人而疑其心公明達不拘唯材所宜不問踈賤此度勝也紹遲重少決失在後機公能斷大事應變有方此謀勝也紹御軍寬緩法令不一士卒雖衆而實難用公法令嚴明賞罰必行士卒雖寡皆爭致死此武勝也紹憑世資從容飾智收名譽故士之寡能好聞者歸之公以至仁待士又推誠心不為虛美行已謙恭儉約而與有功者無吝故忠正殺身之士咸願為用此德勝也夫以此四

勝仗義征伐誰敢不從紹以四失背忠自專強何能為
操悅秋七月即拜太尉表紹為大將軍於是馬日磾喪
還京師將欲加禮少府孔融議曰日磾以上公之尊秉
旄節之使銜命直指寧輯東夏而曲媚賊臣為所牽率
章表署用輒使首名附下罔上姦以事君昔國佐當晉
軍而不撓宜僚臨白刃而正色王室大臣不得以見脅
為辭鄭人討幽公之亂斲子家之棺聖人哀矜未忍追
治不宜加禮冬十月謁者僕射襄茂督三輔諸軍討李

催也

三年春正月破催斬之夷三族郭汜為其將伍習所殺
李樂病死胡才為怨家所殺張陽為其將眭固所殺馬
騰韓遂涼州自相攻擊五月韓暹楊奉死秋七月曹操
征張繡破之荀彧說曹操曰不先取呂布河北未易圖
也操曰若素紹侵擾關中西羌南誘蜀漢是我獨以充
州抗天下五分之一也為之柰何彧曰關中將帥以十
數莫能久相一唯韓遂馬騰最強彼見山東之敗必各

擁衆自保全若撫以恩德使連和相推雖不能久要公
定山東足以不動鍾繇可屬以西事公無憂也操從之
九月替操征呂布是歲袁術自立為天子術與楊彪婚
親也操忌彪忠正收彪付獄將殺之孔融聞之不及朝
服往見操曰楊彪累世清德四葉重光周書父子兄弟
罪不相及況袁氏之罪乎易稱積善餘慶但欺人耳操
曰國家之意也融曰假使成王欲殺召公則周公可得
言不知邪今天下纓綬搢紳之士所以仰瞻明公者以

輔相漢室舉直措枉致之雍熙也今橫殺無辜則海內
觀聽誰不解體孔融魯國之男子明日便當拂衣而去
不復朝也操意解乃免彪彪覩漢祚將微自以累世公
輔恥事異姓遂稱疾不行徵鄭玄為大司農不至玄字
康成北海高密人也為嗇夫隱恤孤苦閭里安之家貧
雖得休假常詣校官誦經太守杜密異之為除吏錄使
得極學玄之右扶風事南郡太守馬融融門徒甚盛弟
子以次相授至三年不得見玄講習彌篤晝夜不倦融

見奇之引與相見自篇籍之奧無不精研歎曰詩書禮樂皆以東矣會黨事起而玄教授不輟弟子數百人中平初悉解禁固玄已六十餘矣始為王公辟命一無所就者玄身長八尺秀眉朗目造次顛沛非禮不動黃巾賊數萬人經玄廬皆為之拜高密一縣不被抄掠袁紹嘗遇玄而不禮也趙融聞之曰賢人者君子之望也不禮賢是失君子之望夫有為之君不失萬民之歡心況於君子乎失君子之望難乎有為也

四年春轉操獲呂布斬之二月司空轉操讓位於太僕
趙岐不聽三月衛將軍董承為車騎將軍封操三千戶
討呂布之功也固讓不受三月袁紹討公孫瓚六月拜
孫策為會稽太守討逆將軍封吳陽侯初彭城人張昭
避亂淮南策賓禮之及策東略遂為之謀主聞袁術僭
號昭為策書諫術曰昔者董卓無道陵虐王室禍加太
后暴及弘農天子播越宗廟焚毀是以豪傑發憤赫然
俱起元惡既斃幼主東顧乃使王人奉命宣明朝恩偃

武修文與之更始而河北異謀黑山不順劉表僭亂於南公孫叛逆於北劉繇阻兵劉備爭盟是以未獲承命橐弓戢戈也常謂使君與國同規舍是不卹睨然有自取之志懼非海內企望之意昔湯伐桀稱有夏多罪武王伐紂曰殷有重罰此二王者雖有聖德假使時無失道之過何由逼而取之也今主上豈有惡於天下徒以幼小脅於僭臣異於湯武之時也又聞幼主明智聰敏有夙成之德天下雖未被恩咸以歸心焉若輔而興之

旦爽之美率土之所望也使君五世相承為漢宰輔榮
寵之盛莫與為比宜效忠守節以報漢室世人多惑圖
緯之言妄牽非類之文苟以悅主為美不顧大義成敗之計
古今所慎也忠言逆耳駁議致憎苟有益於使君則無
所敢辭術始自以為有淮南之衆料策之必與已合及
得其書遂愁沮發疾袁紹自破公孫瓚貢御希慢私使
主簿耿苞密白曰赤德運衰歷數將改宜順天意以應
民望紹以苞白事咨於軍府議者咸以苞為妖妄宜誅

紹殺苞以悅衆然遂有逆謀於是紹將南出師以攻曹操沮授田豐諫曰師出歷年百姓疲弊倉庫無積賦役方殷此國之深憂也宜遣使獻捷天子務農逸民若不得通乃表曹操隔我王路然後進屯黎陽漸營河南益作船舶繕治器械分遣精騎抄掠邊鄙令彼不得安我取其逸三年之中事可坐定也審配郭圖曰兵書之法十圍五攻敵則能克今以明公之神武跨河朔之人衆以伐曹氏譬若覆手今不時取後難圖也授曰蓋救亂

誅暴謂之義兵恃衆憑強謂之驕兵兵義無敵驕者先
滅曹氏迎天子建宮許都今興師南向於義則違且廟
勝之策不在強弱曹氏法令既行士卒精鍊非公孫瓚
坐而受圍者也今棄萬安之術而興無名之兵竊為公
危之圖曰武王伐紂不為不義況伐曹師而云無名且公
師武臣勇將士憤怒人思自騁而不及時早定大業慮
之失者夫天與不取反受其咎此越之所以霸吳之所
以亡也監軍之計蓋非見時知機之策紹從之圖等因

是譖授曰授監統內外威震三軍若其浸威何以制之
夫臣與主同者昌主與臣同者亡黃石之所忌也且御
衆於外不宜知內紹疑焉乃分監軍為三都督使授及
郭圖淳于瓊各典一軍遂南冬十一月張繡賈詡降曹
操十二月甲辰司隸校尉鍾繇持節鎮撫關中庚辰曹
操率師拒袁紹於官渡孔融謂荀彧曰紹地廣兵強田
豐許攸智計之士也為之謀審配逢紀盡忠之臣也任
其事顏良文醜勇冠三軍統其兵殆難克乎彧曰紹兵

雖強而法不整田豐剛而犯上許攸貪而不治審配專而無謀逢紀果而自用此二人留知後事若攸犯法必不能宥也不宥攸必為變顏良文醜一夫之勇耳可一戰而擒也袁術欲北至青州曹操使劉備要擊之會術病死操悔遣備追之不及備遂據下邳

五年春正月壬午車騎將軍董承偏將軍王服謀殺曹操發覺伏誅初承與劉備同謀未發而備出謂服曰郭汜有數百兵壞李傕數萬人但足下與吾同不耳昔呂

不韋之門須子楚而後高今吾與子猶是也服惶恐不敢當曰兵少奈何承曰第興事奪得曹公兵何憂不足耶服曰今京師豈有可任者乎承曰長水校尉种輯議郎吳碩是吾腹心辦事者輯碩皆被誅曹操攻劉備備奔袁紹二月紹遣沮授郭圖淳于瓊顏良等攻劉延於白馬紹引兵至黎陽沮授臨發會其宗族散貨財以與之曰夫勢存則威無不行勢亡則不保一身哀哉其弟宗曰曹公士馬不敵兄何懼焉授曰以曹兗州之明略又挾天

子為資我雖克伯珪衆實疲敝而主驕將汰軍之破敗
在此舉矣揚雄有言曰六國蚩蚩為羸弱姬今之謂矣
夏四月曹操救劉延大戰斬顏良秋七月辛巳立皇子
馮為南陽王壬午南陽王薨八月袁紹將濟河沮授諫
曰勝負變化不可不詳今宜留屯延津分兵官渡若剋
獲還迎不晚設其有難衆不可還紹不從授臨濟歎曰
上盈其志下務其功悠悠黃河吾其濟乎遂以疾辭紹
恨之乃省其所部并屬郭圖遂軍官渡紹衆盛操軍大

懼與荀彧書議欲還許以引紹彧報曰紹聚官渡欲與
決勝負公以至弱當至強若不制必為所乘是天下之
大機也且紹布衣之雄能聚人而不能用以公神武
明哲而奉以大順何向而不濟今軍食雖少未若楚漢
在滎陽成皋間也是時劉項莫肯先退先退者勢屈也
公以十分居一之衆畫地而守之扼其喉而不能進已
半年矣情見勢竭必將有變此用奇之時不可失也操
從之劉備去袁紹南奔汝南九月庚子朔日有蝕之詔

公卿各上封事靡有所諱表曹相持於官渡孫策欲襲許迎乘輿部署未發為許貢客所害先是吳郡太守許貢為策所殺其小子與客謀報曰孫策勇銳若多殺人於道策必自出則可擒也客從之乃殺人於江邊策聞之怒單騎自出客刺傷之將死謂張昭曰中國亂以吳越之衆三江之固足可觀成敗公等善輔吾弟呼權佩以印綬曰舉江東之衆決機於兩陣之間與天下爭衡卿不如我任賢使能各盡其力以保江東我不如卿初

策在吳與張昭論曰今四海未定當以武平之耳吳人
陸績年少在坐末大聲言曰昔管夷吾相齊桓公九合
諸侯一匡天下不用兵車孔子曰遠人不服則修文德
以來之今諸君不務道德懷取之術而唯尚武績雖童
蒙竊所未安也昭等異焉績容貌雄壯博學多識星厯
算數無不該覽及權統事奏辟曹掾以直道見憚出為
鬱林太守加偏將軍績意在儒雅非其志也雖在軍旅
著述不廢作渾天圖注易釋玄皆傳於世預自知亡日

乃為辭曰有漢士人吳郡陸績幼敦詩書長翫禮易受命南征遘疾逼厄遭命不永嗚呼悲隔又曰從今已去六十年之外車同軌書同文恨不及見也十一月甲子曹操與袁紹戰於官渡紹師大潰沮授為操軍人所執授大呼曰授不降也為所執耳操與之有舊遂謂之曰分野殊異遂用阻絕不圖今日乃相擒也授對曰冀州失策以取奔北授智力俱困宜其見擒操曰本初無謀不相用計今喪亂過紀國家未定當相與圖之授曰叔

父母弟懸命袁氏若蒙公靈速死為福操歎曰孤早相得天下不足慮也遂舍而厚遇之頃之謀歸袁氏操殺之

六年春三月曹操以袁紹新敗欲悉軍以征劉表以問尚書令荀彧或曰今紹之敗其衆離心宜因而定之而欲遠背兗豫南軍江漢夫困獸猶鬪況在紹乎若紹收其遺燼承虛以出則公之事去矣四月曹操將兵於河上八月辛卯侍中郝慮尚書令荀彧司隸鍾繇侍講于

內冬十一月曹操征劉備備奔劉表屯新野

七年夏五月庚戌袁紹發病死初紹有三子譚熙尚譚長而惠尚少而美紹妻愛尚數稱其才紹以奇其貌欲以為後乃出譚為青州刺史沮授諫曰世稱一兔走衛萬人逐之一人獲之貪者悉止分定故也且年均以賢德均則卜古之制也願上推前代成敗之誠下思逐兔分定之義紹曰孤欲令三子各據一州以觀其能授出曰禍其始此矣及紹未命而死其別駕審配護軍逢紀

宿以驕侈為譚所疾於是紀外順紹妻內慮私害乃矯言遺命奉尚為嗣譚至不得立自稱車騎將軍由是有隙譚軍黎陽九月曹操征譚尚越雋男子化為婦人周羣曰將有易代之事

八年春操破譚尚秋七月曹操上言守尚書令荀彧自在臣營參同計畫周旋征伐每皆超捷奇策密謀悉皆共決及或在臺常私書往來大小同策詩美腹心傳貴廟勝勲業之定彧之功也而臣前後獨荷異寵心所不

安或與臣事通功並宜進封賞以勸後進者於是封或為萬歲亭侯八月曹操征劉表軍次西平譚尚爭異州九月公卿迎氣北郊始用八佾冬十月曹操至黎陽

九年夏四月操拔邯鄲秋八月曹操破鄴袁尚袁熙奔奴辛巳封蕭何後為安衆侯九月太中大夫孔融上書曰臣聞先王分九圻以近及遠春秋內諸夏而外夷狄詩云邦畿千里惟民所止故曰天子之居必以衆大言之周室既衰六國力征授賂強秦割裂諸夏鎬京之制商邑之

度歷載彌久遂以闇昧秦兼天下政不遵舊革剋五等
掃滅侯甸築城萬里濱海立門欲以六合為一區五服
為一家關衛不設家庭臨海遂使陳項作難擊析不救聖
漢因循未之匡改猶依古法潁川南陽陳留上黨三河
近郡不封爵諸侯臣愚以為千里國內可略從周官六
鄉六遂之文分取北郡皆令屬司隸校尉正以王賦以
崇帝室役自近以寬遠華夏貢獻外薄四海揆文奮武
各有典書帝從之戊辰以司空曹操領冀州牧或說操

曰宜復古制置九州則所制者廣大天下服矣操將從之荀彧言於操曰冀州求公領牧以要民心甚善至於分改九州竊有疑焉若是冀州當取河東馮翊扶風西河并幽之地所奪者衆前日公破袁尚擒審配海內震駭人人自恐不保其土地守其兵衆也今便分屬冀州將皆動心且人多說關右將士以動心之計今聞此必以為次第見奪一旦生變有善守者轉相脅為非則袁尚得寬其死而袁譚懷貳劉表遂保江漢之間天下未

易圖也願公引兵先定河北然後修復舊京南臨荊州黃王貢之不入則天下咸知其意人人自安天下大定乃議古制操曰微足下失之者多矣遂寢九州之議十月有星孛於東井分涼州四郡為梁州

十年春正月曹操攻袁譚於南皮大破斬之丁丑增封操萬三千戶平幽冀之功也八月侍中荀悅撰政治得失名曰申鑑既成而奏之曰夫道之本仁義而已五典以經之羣籍以緯之詠之歌之絃之舞之前監既明後

復申之致治之術先屏四患乃崇五政一曰偽二曰私
三曰放四曰奢偽亂俗私壞法放越軌奢敗制四者不
除則政末由行矣其致也俗亂則道荒雖天地不得保
其性也法壞則世傾雖人主不得守其度也軌越則禮
亡雖聖人不得全其道矣制敗則欲肆雖四表不能充
其求矣是謂四患修農桑以養其生審好惡以正其俗
宣文教以章其化立武備以秉其威明賞罰以統其法
是謂五政民不畏死不可懼以罪人不樂生不可勸以

善雖使契布五教咎繇作士政不行矣故在上者先豐
民財以定其志帝耕籍田后桑蠶宮國無遊民野無荒
業財不虛用力不妄加以周民事是謂養生君子之所
以動天地感神明正萬物而成至治者必乎真實而已
故在上者審定好惡好惡既定乎功罪毀譽亦終於準
驗聽言責事舉名察實無或作詐偽淫巧以蕩衆心故
事無不核物無不切善無不顯惡無不彰俗無姦詐民
無淫風百姓上下覩利害之存乎已也故肅敬其心內

不回惑外無異望則民志平矣是謂正俗君子以情用
小人以刑用榮辱者賞罰之精華也故禮教榮辱以加
君子化其情也桎梏鞭扑以加小人治其刑也君子不犯辱
況於刑乎小人不忌刑況於辱乎若其在中人之倫則
禮刑兼焉教化之廢推中人而墮於小人之域教行之
行引中人而納於君子之塗是謂章化小人之情緩則
驕驕則怠怠則怨怨則叛危則謀亂安則思欲非威強
無以懲之故在上者必有武備以戒不虞以遏寇虐安

居則寄之內政有事則用之軍旅是謂秉威賞罰政之
柄也賞明罰審信順令行賞以勸善罰以懲惡人主不
妄賞非徒愛其財也賞妄行則善不勸矣不妄罰非徒
矜其人也罰妄行則惡不懲矣賞不勸謂之止善罰不
懲謂之縱惡在上者能不止下為善不縱下為惡則國
法立矣是謂統法四患既蠲五政既立行之以誠守之
以固簡而不怠疎而不失無為為之使自施之無事事
之使自安之不肅而成不嚴而治垂拱揖讓而海內平

矣古者天子諸侯有事必告於廟廟有二史左史記言
右史記事事為春秋言為尚書君舉必記善惡成敗無
不存焉下及士庶苟有淺異咸在載籍或有欲顯而不
得欲隱而名彰得失一朝榮辱千載善人勸焉淫人懼
焉可備史官掌其典常上覽而善焉悅字仲豫潁川人
也少有才理兼綜儒史是時曹公專政天子端拱而已
上既好文章頗有才思以漢書為繁使悅刪取其要為
漢紀三十篇冬十一月并州刺史高幹反

十一年正月有星孛于北斗占曰人主易位曹操征高
幹斬之己丑增封操并前三萬戶食柘城陽夏四縣比
鄧禹吳漢故事秋七月武威太守張猛殺涼州刺史商
邯

後漢紀卷二十九

欽定四庫全書

後漢紀卷三十

晉 袁宏 撰

孝獻皇帝紀第三十

十二年春曹操上表曰昔袁紹入郊甸戰於官渡時兵少糧盡圖欲還許荀彧乃建進討之規遂摧大逆覆取其衆此或覩勝敗之機畧不出世紹既破敗臣糧亦盡以為河北未易圖也欲南討劉表或復止臣陳其得失

臣用反旆於是遂平四州向使臣退於官渡紹必鼓行而前遂征劉表則河北延其凶計或之二策以亡為存以禍為福臣所不及也是故先帝貴指縱之功薄搏獲之賞古人尚帷幄之規下攻拔之捷原其績效足享高爵而海內未喻其狀所受不侔其功臣誠惜之乞重平議增封戶邑或深辭讓操報之曰君之策謀非但所表二事而已前後謙冲欲慕魯連先生乎此聖人達節者所以貴也昔介子推有言竊人之財猶謂之盜況君宥謀

安衆先於孤者以百數乎以二事相還而復辭何取謙
亮多邪三月癸丑增封守尚書令或戶一千并前二千
戶操欲表或為三公或使荀攸申讓至於十數乃止是
時或謂操曰公子聰明雋上宜高選天下賢哲以師保之輔
成至德及征行軍宜以為副貳使漸明御軍用兵之道
操從之秋八月曹操登白狼山與匈奴冒頓戰大破斬
之袁尚袁熙奔遼東太守公孫康斬尚熙首送京師乙酉
封操三子為列侯操不受冬十月星孛於鶉尾乙酉濟

南王斌為黃巾所殺劉備屯新野荊州豪傑歸者日衆
琅邪陽都人諸葛亮字孔明躬耕隴畝好為梁甫吟身
長八尺嘗自比於管仲樂毅時人莫之許也唯博陵崔
州平潁川徐元直與亮友善謂之信然於是徐庶見劉
備曰諸葛孔明卧龍也將軍豈願見之乎備曰君與俱
來庶曰此人宜可以就見不可屈致將軍且枉駕顧之
由是備三詣其廬因屏人而言曰漢室傾頽姦臣竊命
主上蒙塵孤不量力度德欲信大義於天下而智術淺

短遂用猖獗至於今日然志猶未已君為計將安出亮
荅曰自董卓以來豪傑並起跨州連郡不可勝數曹操
比於袁紹則名微而衆寡遂能克紹以弱為彊此非唯
天時抑亦人謀也今已擁百萬之衆挾天子而令諸侯
此誠不可與爭鋒孫權據有江東已歷三世國險而民
附賢能為之謀此可與之為援不可圖也荊州北據漢
沔利盡南海東連吳會西通巴蜀此用武之國而其主
不能守殆天將所以資將軍也益州險塞沃野千里天府之地

高祖因之以成帝業劉璋闇弱張魯在北民殷國富而不知存卹智能之士思得明后將軍既帝室之胄信義著於四海總攬英雄思賢如渴若跨有荆益保其巘阻西和諸戎南撫夷越結好孫權內修政治天下有變命一上將將荊州之軍以向宛洛將軍身率益州之衆出於秦川百姓孰不簞食壺漿以迎將軍者乎如是霸業可成漢室復興也備曰善於是與亮情好日密諸將不悅備解之曰孤之有孔明猶魚之得水願諸君勿復言

十三年春正月癸未司徒趙溫請置丞相秋七月曹操
征劉表八月丁未光祿大夫郗慮為御史大夫初操以
穀少禁酒太中大夫孔融以為不可與操相覆疏因以
不合意時中州畧平惟有吳蜀融曰文德以來之操聞
之怒以為怨誹浮華乃令軍諮祭酒路粹傳致其罪士
子太中大夫孔融下獄誅妻子皆棄市融字文舉魯國
人孔子二十世孫幼有異才年十餘歲隨父詣京都時
河南尹李膺有重名敕門通簡賓客非當世英賢及通

家子孫不見也融欲觀其為人遂造膺門曰我是李君
通家子孫門者白膺請見曰高明父祖嘗與僕周旋乎
融曰然先君孔子與君家李老君同德比義而相師友則
僕累世通家也衆坐莫不歎息僉曰異童子也太中大
夫陳祿後至同坐以告祿曰小時了了者至大亦未能
奇也融曰如足下幼時豈常惠乎膺大笑謂融曰高明
長大必為偉器年十三喪父哀慕毀瘠杖而後起州里
稱其至孝初山陽張儉與融兄裒友善亡命來詣裒適

出時融年十六儉不告融知儉長者有窘迫色謂曰吾獨不能為君主邪因留舍藏之後以門客發泄國相以下密就掩捕儉得脫走收融及哀送獄融曰保內藏舍者融也當坐之哀曰彼來求我求我之由非弟之過我當坐之兄弟爭死郡縣疑不能決乃上讞詔書令哀坐之融由是顯名年二十八為北海太守先是黃巾破青州融收合夷民起兵自守賊張餘等過青州融逆擊為其所敗收餘兵保朱虛稱詔誘吏民復置城邑崇學校

庠序舉賢貢士表顯耆儒以彭璆為方正邴原為有道王
修為孝廉告高密縣為鄭玄特立鄉名曰鄭公鄉又國
人無後及四方遊士有死亡皆為棺木而殯葬之使甄
子然臨配食縣社其禮賢如此劉備表融領青州刺史
年餘為羣賊所攻不能自守建安初徵為將作大匠遷
少府每朝會訪對輒為議主諸卿大夫寄名而已初潁
川陳紀論復肉刑書曰惟敬五刑以成三德易著剝削
滅趾之法所以輔政助教懲惡息殺也且殺人償死合

於古制至於傷人或殘毀其體而纔翦毛髮非其理也
若用古刑使淫者下蠶室盜者刖其足永無淫放穿窬
之姦矣融難之曰古者吏端刑清治無過差百姓有罪
皆不之濫末世凌遲風化壞亂法害其民故曰上失其
道民散久矣而欲繩之以古刑投之以殘棄非所謂與
時消息也紂斲一朝涉之脛天下謂之無道九牧之地
千八百君若各刖一人是下常有千八百紂也求世休
和不可得已且被刑之人慮不全生志在思死類多趨

惡夙沙亂齊伊戾禍宋趙高英布為世大患雖忠如鶩
權信如卞和智如孫臏冤如荅伯才如史遷達如子政
一罹刀鋸沒世不齒是太甲之思庸穆公之霸秦陳湯
之都賴魏尚之邊功無所復施也曹公將復肉刑以衆
議不同乃止

袁宏曰夫民心樂全而不能常蓋利用之物懸於外而
嗜慾之情動於內也於是有陵競之行放肆希求放肆
不已不能充其嗜慾也則苟且僥倖之所生也希求無

厭無以遂其欲也則姦偽忿怒之所興也先王知其如此而欲救弊故先以德禮陶其心其心不化然後加以刑辟書云百姓不親五品不遜汝作司徒敬敷五教在寬蠻夷猾夏寇賊姦宄汝作士五刑有服然德刑之設叅而用之者也三代相因其義詳焉周禮使墨者守門劓者守閭宮者守內刖者守圉此肉刑之制可得而論也荀卿亦云殺人者死傷人者刑百王之所同未知其所由來者也夫殺人者死而相殺者不已是大辟可以

懲未殺不能使天下無殺傷人者刑而害物者不息是
黥劓可以懼未刑不能使天下無刑也故將欲止之莫
若先以德禮夫罪過彰著然後入於刑辟是將殺人者
不必刑也縱而不已則陷於刑辟矣故刑之所制在於
不可移之也禮教則不然明其善惡所以潛勸其情消
於未然也示以耻辱所以內化其心治之未傷也故過
微而不至於著罪薄而不及於刑也終入辜辟者非風
化之所能移也故雖殘一物之生刑一人之體是除天下

之害夫何傷哉率斯道也風化可以漸淳刑罰可以漸少其理然也苟不化其心而專任刑罰民失義方動陷刑網求世休和焉可得哉周之成康豈案三千之文而致刑措之美乎蓋德化刑清所致斯有由也漢初懲酷刑之弊務寬厚之論公卿大夫相與耻言人過文帝登庸加以玄默張武受賂賜金以愧其心吳王不朝崇禮以讓其失是以吏民樂業風化篤厚斷獄四百幾於刑措豈非德刑兼用之效哉世之論者欲言刑罰之用不先

德教之益失之遠矣今大辟之罪與古同制免死以下
不過五歲既釋鉗鑼復齒於人是以民不恥惡數為盜
姦故刑徒多而亂不治也苟教之所去一離刀鋸沒身
不齒鄰里且猶恥之而況朝廷乎如此則風沙趙高之
儔無所施其惡則陳紀所謂無淫放穿窬之姦於是全
矣古者察言觀行而善惡彰焉然則君子之去刑辟固
已遠矣設有不幸則八議之所宥也若夫卞和史遷之
寃淫刑之所及也苟失其道或不免於大辟而況肉刑

哉又當刑之與枉殺人其理不同則死生之論固已踈矣漢書斬右趾及殺人先自告吏坐受財守官物而即盜之皆棄市此班固所以謂當生而令死者也今不忍截割之慘而安剿絕之悲此皆治體之所先而有國所宜改者也劉表病死少子琮領荊州九月劉琮降曹操劉備率衆南行曹操以精騎追之及於當陽備與諸葛亮等數十騎邪趣漢津徐庶母見獲庶辭備而指其心曰本與將軍共圖王霸之業以此方寸之地也今失老

母方寸亂矣無益於事請從此辭遂詣曹操操既有荊州水軍十萬將順流東伐吳人震恐議者咸勸孫權迎操周瑜曰不然操雖託名漢相其實漢賊將軍以神武雄才兼仗父兄之烈割據江東地方數千里精兵足用英豪樂業尚當橫行天下為漢除殘去害況操自送死何迎之有瑜得精兵三萬保為將軍破之權曰老賊欲廢漢天子自立久矣徒忌二袁劉表與孤耳今數雄已滅唯孤存孤與老賊勢不兩立君言當擊甚與孤合此

天以君授孤也劉備至夏口諸葛亮謂備曰事急矣請
求救於孫將軍時權軍於柴桑備使亮說權曰海內喪
亂將軍起兵江東豫州亦收衆漢南與曹操並爭天下
今操芟夷大難畧平矣遂破荊州威振四海英雄無所
用武故豫州遁逃至此將軍量力而處之若能以吳越
之衆與中國抗行不如早與之絕若不能何不案戈束
甲北面而事之乎今將軍外託服從之名內懷猶豫之
計事急而不斷禍至無日矣權曰苟如君言劉豫州何

不事之乎亮曰田橫齊之壯士耳猶義不辱況豫州王室之胄英才蓋世人之仰慕若水之歸海事之不濟此乃天也安能復為之下權勃然曰吾不能以全吳之地十萬之衆受制於人吾計決矣非劉豫州莫可當曹操者然豫州新敗之後復能抗此難乎亮曰豫州雖敗戰士還者精甲萬人曹操之衆遠來疲弊聞追豫州騎一日一夜行三百里此所謂強弩之末不能穿魯縞者也故兵法忌之曰必蹙上將軍且北方之人不習水戰又

荊州之民附操者逼以兵勢耳非心服也將軍誠能命
猛將統兵數萬與豫州協規同契破操必矣操敗必北
還如此則荊吳之勢強鼎足之形成成敗之機在於今
日權大悅即遣周瑜將水軍三萬隨亮詣備并力拒操
冬十月癸未日有蝕之十二月壬午徵前將軍馬騰為
衛尉是月曹操與周瑜戰於赤壁操師大敗

十四年劉備以孫權行車騎將軍備自領荊州屯公安
七月曹操征孫權冬十月晦日有蝕之

十五年春二月乙巳日有蝕之

十六年春正月辛巳以曹操世子丕為五官中郎將副丞相三月馬超韓遂反秋七月操征超遂大破之是歲劉備入益州

十七年春正月加曹操入朝不趨劔履上殿贊拜不名夏五月癸未誅衛尉馬騰超之父也六月庚寅晦日有蝕之秋七月庚戌立皇子臨為濟陰王懿為山陽王邈為濟北王敦為東海王冬十月曹操征孫權侍中尚書

令荀彧勞軍於譙初董昭等謂曹操宜進爵郡公九錫
備物以彰殊勲密以語彧彧曰曹公本興義兵以匡朝
寧國秉忠貞之誠守退讓之實君子愛人以禮不宜如
此操由是心不平之是行也操請彧勞軍因留彧以侍
中光祿大夫持節監丞相軍事次壽春彧以憂死

袁宏曰夫默語者賢人之經畧也卷舒廢興之間非徒
以智屈伸貴其多算權其輕重而揣難易焉君子之行
已也必推其心而達其道信其誠而行其義義不違心

故百姓知其無私道不失順則天下以為至當其出也
忠著於時君仁及於天下匹夫匹婦莫不咨嗟者以其
致功之本於義也若時不我與中道而廢內不負心外
不媿物千載之下觀其迹而悲其事以為功雖不就道
將可成也及其默也非義而後退讓謀而後止蓋取舍
不同故宛轉龍蟠以求其志雖仁者之心大存兼愛援手
而陷於不義君子不為也苟違斯道四體且猶致患而
況萬物乎漢自桓靈君失其柄陵遲不振亂殄海內以

弱致弊虐不及民劉氏之澤未盡天下之望未改故征伐者奉漢拜爵賞者稱帝名器之重未嘗一日非漢魏之平亂資漢之義功之克濟荀生之謀謀適則勲隆勲隆則移漢劉氏之失天下荀生為之也若始圖一匡終與勢乖情見事屈容身無所則荀生之識為不智矣若取濟生民振其塗炭百姓安而君位危中原定而社稷亡於魏雖親於漢已疎則荀生之功為不義也夫假人之器乘人之權既而以為已有不以仁義之心終亦君

子所恥也一汙猶有慙色而況為之謀主功奮於當年
迹聞於千載異夫終身流涕不敢謀燕之徒隸矣功自
已為之而已死之殺身猶有餘媿焉足以成名也惜哉
雖名蓋天下而道不合順終以憂卒殞身於不義故曰
非智之難處智之難非死之難處死之難嗚呼後之君
子默語行藏之際可不慎哉

十八年春二月庚寅省幽州并州以其郡國并屬冀州
省司隸校尉以其郡國分屬豫州省梁州以其郡國并

屬益州夏五月丙申天子使御史大夫郅慮持節策命
曹操為公曰朕以不德少遭憫凶越在西土遷在唐魏
當此之時殆若綴旒宗廟乏祀社稷無位羣凶覲覲分
裂諸夏率土之民朕無獲焉即我高祖之命將墜於地
朕用夙興假寐振悼於厥心曰惟考惟祖股肱先正其
孰恤朕躬乃誘天衷誕育丞相保乂我皇家弘濟於艱
難朕實賴之今將授君典禮其敬聽朕命昔者董卓初
興國難羣后釋位以謀王室君則首啓戎行此君之忠

於本朝也後及黃巾反易天常侵我三州延及平民君
又翦之以寧東夏此又君之功也韓暹楊奉專用威命
君則致討克黜其難遂遷許都造我京邑設官兆祀不
失舊物天地鬼神於是獲人此又君之功也袁術僭逆
肆於淮南懾憚君靈用丕顯謀蕲陽之役橋蕤授首稜
威南邁術以殞潰此又君之功也迴戈東征呂布就戮
乘輅將反張陽殂斃睦固伏罪張繡稽服此又君之功
也袁紹逆常謀危社稷憑恃其衆稱兵內侮當此之時

王師寡弱天下寒心莫有固志君秉大節精貫白日奮
其武怒運其神策致屈官渡大殲醜類俾我國家拯於
危墜此又君之功也濟師黃河拓定四州袁譚高幹咸
梟其首海盜奔迸黑山順軌此又君之功也烏桓三種
崇亂二世袁尚因之逼處塞北束馬懸車一征而滅此
又君之功也劉表背誕不供貢賦王師首路威風先逝
百城八郡交臂屈膝此又君之功也馬超成宜同惡相
濟濱據河潼求逞所欲殄之渭南獻馘萬計遂定邊城

撫和戎狄此又君之功也鮮卑丁零重譯而至單于白
屋請吏率職此又君之功也君有定天下之功重之以
明德班序海內宣美風俗旁施勤教表繼絕世舊德前
功罔不咸秩雖伊尹格於皇天周公光於四海方之蔑
如也朕聞先王並建明德祚之以土分之以民崇其寵
章備其禮物所以蕃衛王室左右厥世也其在周成管
蔡不靜懲難念功乃使邵康公賜齊太公履東至於海
西至於河南至於穆陵北至於無棣五侯九伯實得征

之世祚太師以表東海爰及襄王亦有楚人不恭王職
又命晉文登為侯伯錫以二輅虎賁斧鉞鉅弓矢大
啟南陽世作盟主故周室之不壞繫二國之是賴今君
丕稱顯德明保朕躬奉荅天命導揚弘烈綏寧九域莫
不率俾功高伊周而賞卑於齊晉朕甚慙焉朕以眇眇
之身託於兆民之上永思厥艱若涉泉水非君攸濟朕
無任焉今以冀州之河東河內魏郡趙國中山常山鉅
鹿安平甘陵平原凡十郡封君為魏國公錫君玄土直

以白茅爰契爾龜用建冢社昔在周室畢公毛公入為卿佐周邵師保出為二伯外內之任君實宜之其以丞相領冀州牧如故又加君九錫其敬聽朕命以君經緯禮律為民軌儀使安職業無或遷志是用錫君大輅戎輅各一玄牡二駟君勸分務本穡人昏作粟帛滯積大業惟興是用錫君袞冕之服赤舄副焉君敦尚廉讓俾民興行少長有禮上下咸和是用錫君軒懸之樂八佾之舞君宣翼風化爰及四方遠人迴面華夏充實是用

錫君朱戶以居君研其明哲思帝所難官才任賢君善
必舉是用錫君納陛以登君秉國之鈞正色處中纖毫
之惡靡不抑退是用錫君虎賁之士三百人君糾逖天
刑章厥有罪犯闕干紀莫匪誅殛是用錫君斧鉞各一
君龍驤虎視旁眺八維掩討逆節折衝四海是用錫君
彤弓一彤矢百茲弓十盧矢千君以溫恭為基孝友為
德明允篤誠感于朕心是用錫君秬鬯一卣圭瓚副馬
魏國宜置丞相以下羣臣百僚皆如漢初諸侯王制往

欽哉敬服朕命簡卹爾衆時亮庶工用終爾顯德對揚
我高祖之休命六月己巳徙趙王珪為博陵王

十九年春三月癸未改授魏公金璽赤散遠遊冠夏五
月劉備赴成都遂有益州諸葛亮為股肱乃峻刑法自
君子小人咸懷怨歎法正諫曰昔高祖入關約法三章
秦民知德今君假借威力跨有一州初有其國未垂惠
撫且容主之義宜相降下願緩刑弛禁以慰其望亮曰
君知其一未知其二秦以無道政苛民怨一夫掉臂天

下土崩高祖因之以成帝業劉璋闇弱自是已來有累世之恩支柱羈縻示相承奉德政不修威刑不肅寵之以位位極則賤順之以恩恩竭則慢所以致弊實由此也吾今先威以法法行則知恩限之以爵爵加則知榮恩榮並濟上下有節為治之要於此為著冬十一月丁卯皇后伏氏廢非上意也曹操使人收后后被髮徒跣而出上謂御史大夫郗慮曰郗公天下寧有是乎后見殺之日后父完及宗族死者百有餘人

二十年春正月立皇后曹氏操女也初操以二女為貴
人大貴人立為皇后三月曹操征張魯秋七月魯遂降
二十一年春正月己丑封魏公子六人為列侯夏四月
甲午進魏公爵為王五月己亥朔日有蝕之

二十二年夏四月命魏王建天子旌旗出警入蹕冬十
月命魏王晃有十二旒乘金根車設五時副車是歲大
疫

二十三年春正月甲子太醫令吉平少府耿晃等謀誅

曹操發覺伏誅三月有星孛于東井

二十四年春三月壬子晦日有蝕之夏五月劉備取漢
中秋八月諸葛亮等上言曰唐堯至聖而四凶在朝周
成仁賢而四國作難高后稱制而諸呂竊命孝昭幼冲
而上官逆謀皆憑世寵藉履國威權窮凶極亂社稷幾
危非大舜周公朱虛博陸則不能擒凶討逆扶危定傾
伏惟陛下誕姿聖德統理萬邦而遭家運不造之難董
卓首亂蕩覆京畿曹操階禍竊執天衡皇后太子鳩殺

見害剝喪天下殘毀民物久令陛下蒙塵幽處人神無
位遏絕王命厭昧皇極欲遷神器左將軍領司隸校尉
豫荊益等州牧宜城亭侯備授朝爵秩念在輸力以徇
國難覩其機兆赫然發憤與車騎將軍董承謀共誅操
將安國靜難克寧舊都會承不密令操遊魂遂得長惡
殘泯海內臣等每懼王室大有閭樂之禍小有定安之
變夙夜惴惴戰慄累息昔在虞書敦序九族周監二代
封建同姓詩著其義歷載長久漢興之初割裂疆土尊

王子弟是以卒折諸呂之難而成太宗之基亮等以備
肺腑枝葉宗子蕃翰心存國家念在弭亂自備破收漢
中海內英雄望風螳附而爵號不顯九錫未加非所以
鎮衛社稷光照萬世奉辭在外詔命斷絕昔西河太守
梁統等值漢中興限於河山位同權均不能相率咸推
竇融以為元帥卒立績效摧破隗囂今社稷之難甚於
隴蜀操外吞天下內殘羣僚朝廷有蕭牆之危而禦侮
未立可謂寒心臣等輒依舊典立備為漢中王拜大司

馬董齊六軍糾合同盟埽滅凶逆以漢中巴蜀廣漢犍
為為國所置依漢初立諸侯王故典夫權宜之制苟利
國家專之可也然後功成事立臣等退伏矯詔之罪雖死無
恨遂於江陽設壇場御王冠於劉備備上言曰臣以具
臣之才荷上將之任董督三軍奉辭於外不能除寇靜
難以匡王室久使陛下聖教陵遲六合否而不泰惟憂
反側疾如疾首曩者董卓造為亂階自是之後羣凶縱
橫殘剝海內賴陛下聖德威靈人神同應或忠義奮討

或上天降罰暴逆並殪以漸水消惟獨曹操久未梟除
侵擅國威恣心極亂臣等昔與車騎將軍董承同謀討
操機事不密承見陷害臣播越失據忠義不果遂得使
操窮凶極逆主后戮殺皇子鳩害雖糾合同盟念在奮
力懦弱不武歷年無效常恐殞歿孤負國恩假寐永歎
夕惕若厲今臣羣僚以為昔在虞書敦叙九族庶明厲
翼五帝以來此道不廢周監二代建諸姬姓實賴晉鄭
夾輔之福高祖龍興尊王子弟大啓九國卒斬諸呂以

安太宗今操惡直醜正實繁有徒包藏禍心篡逆已顯
既王室微弱帝族無位斟酌古式依假權宜上臣大司
馬漢中王印綬所獲已過不宜復忝高位以重罪謗羣臣見
逼迫以大義追惟寇賊不梟國難未已宗廟傾危社稷
將墮誠臣深憂碎首之日若應權通變以寧聖主雖越
水火所不敢辭常慮於懷以防後悔輒順衆議拜受印
璽以崇國威仰惟爵高寵厚俯思自效憂深責重驚悸
累息如臨於谷輒將率六軍順時撲討以寧社稷以報

萬分九月丞相掾魏諷謀誅曹操發覺伏誅諷有威名
潛結義士坐死者數千人

二十五年春正月庚子魏王曹操薨諡曰武王壬寅詔
曰魏太子丕昔皇天佑乃顯考以翼我皇家遂攘羣凶
戡定九州弘功茂績光于宇宙朕用垂拱三十有餘載
天不憖遺一老永保余一人早世潛神哀悼切傷丕奕
世宣明宜秉文武紹熙前緒今使使持節御史大夫華
歆奉策詔授丕丞相印綬魏王璽黻領冀州牧方今外

有遺虜遐夷未賓旗鼓尚在邊境干戈不得韜刃斯乃
播揚洪烈立功垂名之秋也豈得修諒闇之禮究曾閔
之志哉其敬服朕命抑弭憂懷旁祇厥緒時亮天工以
稱朕意於戲可不勉乎二月丁未朔日有蝕之冬十月
乙卯詔曰朕在位三十有二載遭天下蕩覆幸賴宗廟
之靈危而復存然瞻仰天文俯察民心炎精之數既終
行運在乎曹氏是以前王既樹神武之績今王又光裕
明德以應其期是歷數昭明亦可知矣大道之行天下

為公選賢與能故唐堯不私於厥子而名播於無窮朕
羨而慕之今其追踵堯典禪位于魏王乃告宗廟使御
史大夫張音奉皇帝璽綬禪位于魏王曰咨爾魏王昔
者帝堯禪位于虞舜舜亦以命禹天命不于常惟歸有
德漢道陵遲世失其序降及朕躬大亂滋昏羣凶肆逆
宇宙傾覆賴武王拯茲難於四方惟清區夏以綏我宗
廟豈余一人獲乂俾九服實受其賜今王欽承前緒光
于乃德恢文武之大業昭爾考之弘烈皇天降瑞人神

告徵誕惟亮采師錫朕命僉曰爾禮度克協于虞舜用
率我唐典敬遜爾位於戲天之歷數在爾躬允執其中
天祿永終君其祗奉大化饗茲萬國以肅天道庚午魏
王即皇帝位改年曰黃初魏帝既受禪問尚書陳羣曰
朕應天順民卿等以為何如羣對曰臣與華歆俱事漢
朝雖欣聖化義形于色

袁宏曰夫君位萬物之所重王道之至公所重在德則
弘濟於仁義至公無私故變通極於代謝是以古之聖

人知治亂盛衰有時而然也故大建名教以統羣生本
諸天人而深其關鍵以德相傳則禪讓之道也暴極則
變則革代之義也廢興取與各有其會因時觀民理盡
而動然後可以經綸丕業弘貫千載是以有德之興靡
不由之百姓與能人鬼同謀屬于蒼生之類未有不蒙
其澤者也其政化遺惠施及子孫微而復隆替而復興
豈無僻王賴前哲以免及其亡也刑罰淫濫民不堪命
匹夫匹婦莫不憔悴於虐政忠義之徒無由自效其誠

故天下翫然新主之望由茲而言君理既盡雖庸夫得自絕於桀紂暴虐未極縱文王不得擬議於南面其理然也漢自桓靈君道陵遲朝綱雖替虐不及民雖宦豎乘間竊弄權柄然人君威尊未有大去王室世之忠賢皆有寧本之心若誅而正之使各率職則二祖明章之業復陳乎目前雖曰微弱亦可輔之時獻帝幼冲少遭凶亂流離播越罪不由已故老後生未有過也其上者悲而思之人懷匡復之志故助漢者協從背劉者衆乖

此蓋民未忘義異乎秦漢之勢魏之討亂實因斯資旌
旗所指則以伐罪為名爵賞所加則以輔順為首然則
劉氏之德未泯忠義之徒未盡何言其亡也漢苟未亡
則魏不可取今以不可取之實而冒揖讓之名因輔弼
之功而當代德之號欲比德堯舜豈不誣哉初魏王欲
以楊彪為太尉彪辭曰嘗已為漢三公遭世衰亂不能
立尺寸之益若復為魏氏之臣於義既無所為於國選
亦不為榮也遂聽所守及魏受禪乃下詔曰夫先王制

几杖之賜所以賓禮黃耆褒崇元老也昔孔光卓茂皆以淑德高年受茲嘉錫公故漢宰臣乃祖以來世著忠賢公年過七十行不踰矩可謂老成人矣所宜寵異以彰舊德其錫公延年杖及伏几筵朝請之日使杖入侍又使著鹿皮帽冠彪上章固讓不聽年八十四以壽終彪字文先幼習祖考之業以孝義稱自為公輔值王室大亂彪流離播越經歷艱難以身衛主不失中正天下以此重之自震至彪四世宰輔皆以儒素名德相承秉

賜雖方節不及震然其恭謹孝友篤誠不忝前列也有
子曰修少有俊才而德業之風盡矣至魏初坐事誅
西魏以河內之山陽封漢帝為山陽公行漢正朔焉明
年劉備自立為天子



後漢紀卷三十